

Хәнты ясәң,



Основана
1 ноября 1957 года

23.03.2023
№6 (3618)

Сарханә мүвн вўләң ёх кассат



8-9 »

Хәнты хәйңән ёрашләңән. Н. Рагимова вәрум хур



Нуви сәңхум
районән нётасты
вәрәт оләңән

» 2

Нымәлн
кәстү
вәр

» 4-5

Сәм
лыпийн
ар

» 12



Нуви сাঁхум районан нётасты вәрәт оләңән

Нуви сাঁхум вошн тәнлүп тыләшн 17-мит хәтлән «Месторождение добра - Урал» нәм тайты проект вәрты ёх па Нуви сাঁхум район хуша вәлты некоммерческой организации (НКО) хуша рәпитетты хуятат яха әктäщсät па «Благотворительная деятельность в Белоярском районе» ёнта пäсан вәрсät.

Лыв путäртсät, муй вўрн там район хуша мира нётты вәрәт елды ләштäтты, па хәләнтсät, муй вўрн там вәрәт Кев хонäңän вәлты мир хуша яма мәнлät. Мет оләңän әкмум ёх «Фонд развития города Тюмени» хуша рәпитетты хуятат хәләнтсät. Лыв «Месторождение добра - Урал» вәр вәрман тайлät. Щи тахи ёх Россия Президент мийляты грант ёша павäтсät. Щи грантän Кев хонäңän вәлты мир хулыева щив хәншман вәллät. Щит мухты мира нётты вәрәт ләштäйт. Марина Викторовна Кабакова, «Пўпи» фонд хуша ух ненä вәлты ими, Нуви сাঁхум хуша ләштäтты проект оләңän путäртäc:

» Мүн Касум вошев мира нётты вән проект хуша хәншман вәл, грант мухты мүнцева нётты пиш вәл. Тәп мүн нумäс вәрсүв па ай вошата па нётты, Нуви сাঁхум район хуша вәлты ай вошата щи проект мухты йис вәлупсы вәрәт ләштäтты.



▲ Нётасты вәрәт оләңän путäртлät. П. Молданов вәрум хур

Щи вәр ләштäтты пäта мира нётты некоммерческой организацийт хуша рәпитетты ёх, атэлт щира вәлты хуятат, лыв пäкты кемелн мира нётты ёх па щи ёх, мата хуятат елды щи вәрәт вәрты питлät. Нуви сাঁхум вошн яха әктäщсät. Марина Викторовна лупäc:

» Ин, мосäн, мира нётты пишт вана ён тайлайт, тәп мүнцева щи вәрәт мослät. Мүн хущева мира нётты вәр, щит мүн йис щирлüb, йис вәлупсэв ләштäтты вәрәт. Мүн щи күш ай вошатн вәлты мирата нётлüb, мүн щи күш йис вәрәт пëла яма вантты мират эвәлт мулты нётулсы кänшлüb муй па щимäц некоммерческой тахет мухты нётлüb. Ай вошн вәлты мира лыv вәрум нумäслад, вәлупсы вуша тәтү нётлüb. Тамхätл мүн елды тәтү нумäслüb, мүн елды ләштäтты нумäслüb - щит мүн йис вәлупсэв шавиман тайты вәрәт па вой-хүл велпäслäтты йис вәрәт яма ләштäтты па ван тайты щирät.

мүн йис вәлупсэв па щира керлälэл. Ал вәлтыйн ар хуят лäңхäl йис вәлупсы вәрәт вәрты, тәп щи вәрәт иши түңа вәрты мосл, йис ёхлüb щира вәрты мосл. Елды и пäнт хўват, и ёш хўват мүнцева шашты мосл, щирн тәп мүн йис ёхлüb нумсät, йис ёхлüb вәрәт ўн юрэмäлгүлүв па ювра ёш пела ён керлälүв.

Там ёнта пäсан - щит мëт оләң әктулсы, та-мäш әктулсэти мүн елды әкäтты па питлüb. Там хätл мүн нумäс вәрсүв, иса Нуви сাঁхум район луваттыйн вәлты мира нётты, некоммерческой тахет яха әкäтты па ай көр тыләшн 5-мит хәтләn па щи там вошн әктäщилтү па ямиева путäрттү, муй вўрн район хуша вәлты мира нётты. Муй вўрн иса вәрәт ушäн щира ләштäтты мосл, щи нумäс вәрты пäта мүн тыв па щи әктäщлüb. Ваньщаёт, Полнавёт, Тўкъякäн мир па тыв юхатлät. Мүн па путäрттү питлüb, мата ёх там вәр елды тәтү нётты питлät. Мүн там хätл щи нумäсн щи вәллüb.

Тамиты щи мира нётты вәрәт Нуви сাঁхум район хуша ләштäтты питлайт. Щи ләштäтты вәрәт «Месторождение добра - Урал» немуп проект хуша хәншман вәллät. Щи пäта щи вәр елды тәтү пиш - щит мүн увас миров йис вәлупсы елды ләштäтты па елды тәтү пиш. Щит Нуви сাঁхум район хуша вәлты хäнтэт па юрнат йис вәлупсэл лылän рүв.

Мүнцева яма вантты мосл, муй тахи пëла щи вәрәт керлälэл, муй вўрн мүн йис вәлупсэв мирн елды тәлтү, ям щира муй па ювра щира. Мүнцева вантты мосл, муй вўрн мүнцева мир нётты вүтшäлät. Мүн яма вәлэв, там хätл вәлупсы

Путэр хäншäс:
Пётр Молданов



Вәнләтәты ёх кәсупсы

Тата мосванән ай көр тыләш 16-мит хәтәлн Нуви сәңхүм вошн округев луватн вәрум «Няврәмәт вәнләтәты ёх ол» сухнуптасы.



▲ Няврәмәт вәнләтәты ёх кәсупсын нух питум хүяттәт округ кәща не Н.В. Комарова пила. depobr.ru тәхи хур

«Камертон» нәмул районән рүтъщәты хотн округ кәща нәңев Наталья Комарова тәм кәсупсын нух питум хәннәхүятта ишәкты нәпекәт катлуптас. Нәл хәтл мәр ай көр тыләш 13-мит хәтл вүш эвәлт па 16-мит хәтл вәнты «Педагог года Югры – 2023» кәсты вәр ләщәтс.

Округев луватн арат-төлн 87 няврәм вәнләтәты хәннәхә 22 арсыр кәртәт па воштәт эвәлт лыв күтәлн кассат.

Мет вулан мойлупсы «Учитель года Ханты-Мансийского автономного округа – Югры» Сәрханл вош № 45 күтуп ўшколайн няврәмәт история па обществоznания вәнләтәты хәя Алексея Никитина тәм олн ямсыева рәпитмал пәта юкантс.

Округев луватн айлатту пухат па эвет рәт ясңела па пүтрупсыя вәнләтйлтү шири Касум вош няврәмәт хәтл мәр лавәлтү «Пешие» нәмул хотн рәпиттү не Лидия Рандымова холумтас.

«Сәмәм няврәмәта мәләм» кәсты хурасн тәм

одн Пойковской вошән Нефтеюганской районән оләңмит күтуп ўшколайн рәпиттү хә Урал Мукминов нух питас.

«Югра мүв округев педагогической дебют» кәсты шири Сәрханл вош № 10 күтуп ўшкола хуша рүш ясана па литературая вәншак классатн няврәмәт вәнләтәты не Мария Смогаржевская мет олән тәхия юхтас.

Па «И сәмев эвәлт кимит сәма» кәсты хурасн Сәрханл вошән № 6 «Василек» нәмул мәт ай няврәмәт пила хәтл мәр лавәлтү хотн рәпиттү хәннәхә Татьяна Боневич олән тәхи холумтас.

«Мет ям кәща шири тәм олн вәлүм хүята» кәсты хурасн Бобровской вошн Ёмвош районән күтуп ўшкола кәща не Жанна Сивкова питас, ши пәта ищи вулан мойлупсын юкантс. «Педагог-психолог» кәсупсы шири тәм олн Ланкипос вош № 4 күтуп ўшколайн рәпиттү не Екатерина Потеряхина йис, лув ищи мойләс.

«Ай няврәмәт хәтл мәр лавәлтү хотатн яма рәпитум не» кәсты вәр

Нижневартовск вош № 2 «Журавушка» ай няврәмәт тайты хотн рәпиттү не Наталья Горькавая олән тәхи холумтас паши пәта мойлупсын па катлуптасы.

Аңкет-ашет па няврәмәт эвәлт «Учитель года Ханты-Мансийского автономного округа – Югры» нәм Андрей Журавский хәя мәс.

Няврәмәт эвәлт мойлупсы «Сәмәм няврәмәта мәләм» па «Педагогический дебют» кәсты хурасатн Урал Мукминов па Мария Смогаржевская тәм олн ёша павәтсән.

Ши олән тәхета юхтум ёх түмпийн арсыр кәртәт па воштәт эвәлт кәсты шири юхтум няврәм вәнләтәты хәннәхүяттә ишити округ кәща нәңевн сырсыр тынән мойлупсэтн па ишәкты нәпекәтн катлуптасыйт. Шиты 2023-мит оләвн «Педагог года Югры – 2023» кәсупсы вәрләт ләщәтсыйт.

Округев образования па наука тәхи вәрум айкеләт шири хәнты ясана тулмащтас:
Владимир Енов

Тәм ол олңитум вүш эвәлт округевн профессиональной патология тәхийн рәпиттү хүяттәт 32 кәртә яңхас. Щимаш вәр ай кәртәтн, вәнт шушетн вәлты мир вантты па ямәлтәты пәта тәлү.

Кәртән, мир ол мәр нух вантлыйт

Ши оләнән путартас. Шокруг дума депутат, «Центр профпатологии» тәхийн мәт вән тохтура вәлты хә Николай Ташланов. Лув лупас:

» Тәм ол олңитум вүш эвәлт мүң леккар ёхлүв Кондинской, Нуви сәңхүм, Сүмәтвош, Манстэр, Ханты-Мансийской районатн 32 кәртә яңхас. Шит иса Югра мүв здравоохранения департамент хәншум шири ләщәтс.

Иса леккар арт хуши 3200 вән па айлат хүят юхтылдас. Тохтурәт 11300 пүш хәннәхүяттә мосты шири нух вантсат, ши күтн флюорография, маммография, УЗИ па па вәртән. Щимаш шири невролог, хирург, сәм, пенк, сәм вантты па па леккар арт кәртәтә яңхләт. Лув 3-4 хәтл мәр ямсыева кәртән хүяттә нух вантләт па мосты лекцитыйлтү вәрләт лыведа хәншләтләт. Тәм леккар машинайн яңхты вәр ай көр тыләш сухантты вәнты мәнты питл.

Лүчән вән Ас, ай асат па юханат хүват тохтурәт тәтъюман «Николай Пирогов» вән түтән хоп яңхийл.

«Центр профессиональной патологии» тәхи айкел хәнты ясана тулмащтас:
Надежда Вах



Нымәлн кäсты вëр

Тäлтäрумн нымәлн муй па лухн велпäс пäнтäт хўватяңхты, нымәлн муй па лухн вой пäнтäт хушты – щит увас миров вëра йис вëрät. Мëт олän лухäн ёх хурат Карелия мëвн кевät əхтыйн вëйтсайт. Щи хурат кева шемäлсайт 5-6 щурас ол тумпийн.

Лухн кäсты па пушкан эвälт есäлты вëр рүш ширн альщäлы биатлон, щи вëр 1954-мит олн Мëв луват олимпийской комитет ёх спорт щира лüнäтты питсäт. 1960-мит олн щи кäсупсы Олимпийской юнтупсэт хуша мäнты питäс, мëв луват мир кäсты тäхийн мëт олän пүш мир биатлон щира кäсты питсäт, щи күшсыры щимäш кäсупсы арсыр тäхетн иши вëс.

Нымәлн кäсты вëр – щит спорт щира вëлты биатлон хурасуп кäсупсы, тäп тäта кäссäт нëмäсия вой-хёл вëлты щира вëлты ёх. Па и вëр тäта па хурасуп, кäсты тäхет нëмäсия ѣн лëштäлтыйт, муй вўрн вой пäнтäт хўват велпäс ёх яңхлät, ишти тäта кäссäт. Тäм кäсупсын тäл тäрумн äплäк ки вäл, äплäк тäхет хўват нымәлн хëхäллät, тäта нëмäсия лëштäум пайлды ёш ѣнтäm.



Вëн ёх нух питсäт

Ёмвош район хуша ай кëр тылäщн 18-мит хäтлän II-мит межмуниципальной кäсупсы вëс, щит «Остяко-Вогульск» нëмупрütäштäт тäхийн вëрста. Ёмвош эвälт вäл. Мëт олän нымәлн кäсты тäхит тäм район хуша

тэнял ол вëс, иши ай кëр тылäщн. Тäм ол, кäсупсы Ёмвош район 100 ода ѹвмаł пäта вëрса.

Тäм пүш нымәлн мäнты хëлум верста мосäс – щит лотäн, репäн мëв хўват. Нымлät – вўлды муй па

күрäнвой кëпläт эвälт вëрум утät. Тäм пүш кäсупсы «Устойчивое развитие коренных малочисленных народов Севера на территории Ханты-Мансийского района» муниципальной программы мухты вëрса. Тäм кäсупсы Ёмвош район кäща ёх па «Остяко-Вогульск» увас мир рëт обшина хутät лëштäт. Тäм вëр пäта «Финансовая корпорация Открытие» банк хуша рëпитты кäща ёхн вухн мäсыйт.

Тäм ол нымәлн кäсты тäхия 22 ики па 9 айдат ёх ѹхатсäт. Айдат ёх – щит 14-17 ола ѹвум пухäт. Кäсты ёх Горноправдинск, Шапша, Луговское ай вошäт эвälт вëсäт, щит Ёмвош район хуша вëлты ай вошäт. Па Ёмвош эвälт мир вëс, па мойца Нефтеюганской район эвälт ёх ѹхатсäт.

Тäм кäсупсы пүншты тäхийн ям вўща ясäн пüтäртäт Ёмвош район ух xä Кирилл Минулин, Югра Дума депутат щира вëлты ими Оксана Михеева, Ёмвош район Дума лänkäär xä



«Моньщ хот» нëмуп ансамбль арилäт-яклäт



Айдат ёх кäсупсын
www.khanty-yasang.ru



▲ Пушкан ёсäl



▲ Ики лүххэн касупсы етшуптас

Павел Астраханцев, увас мир пата вэлты «Югра лылнуутаты» вэрят хуша ух ими Людмила Алфёрова, моньщ-путэр тайты па арён путэр хэншты хэнты имие Мария Волдина.

Тэм касты тэхетн нымалн сора хэхэлты мосл, щи пата вेера каркама вэлты мосл, щи киньща па пневматической винтовка эвэлт тэса ёсälты мосл, щэлта па Агафонов нэм тайты карты лыс сора омсалтаты, щи юпийн па рат хэр сора вүщатты мосл.


Тэм касупсы мэнты тэхийн Ёмвош район хуша рүтүщаты щира веरты проектат па мир ешалт ванлтасыйт, щи олдэн кэштайт путартас. Щэлта па организационно-методической центр хуша рэпитти ёх ванлтас, муй вүрн ийс пурмас ёнты па веरты, щэлта па «Моньщ хот» нэмумп ансамбл имет арисэт-яксэт. Щи киньща па касты ёх муй па мойна юхтум ёх нюки хотн увас мир лётутн ձапартсайт. Щэлта па тата вүлэн хэр вэс, щи тэхийн мойн ёх вүлүн пида хур вүты пищ тайсэт. Щи хэлтэн лоньщ хуват яңхты «Буранан» наврлтаты пищ вэс, щит хуты мата хэннечэ щимааш

каш ки тайс. Щэлта па ёр ванлтаты хэр па тынща вал эхтыя вүшкэты тэхи вэс.

Касупсыйн мэт нух питс Ненефтеюганской район эвэлт юхтум ёх (Ю. Шишкун, Н. Постолов, М. Жердев), кимэт тэхи ёша паватс Шапша вошн вэлты ёх (С. Спиридовон, И. Ващенко, А. Решиков), хэлмит тэхийн – Ёмвош район хуша вэлты па яха пилтэшум ёх (И. Слинкин, В. Простоквишин, В. Слинкин). Айлат ёх касупсыйн карты лыс ѣн омсалтыйдсэт. Щэлта нух питс Горноправдинск вошн ёх (Е. Ронин, П. Коржовский, И. Неколацкий), кимэт тэхи ёша паватс Луговской вошн вэлты нявлрэмт (И. Вебир, Д. Долгов, В. Самолов, Ю. Ипот), хэлмит тэхия питс Горноправдинск па Луговской эвэлт яха пилтэшум кэтнэн (А. Милохин, А. Ремир).

Тэм касупсы олдэн вэна ювум хэннечэ Анатолий Горохов путартас:

» Ма Ёмвош эвэлт, пенсиян вэллум, еша вэл 70 ода щи ийлум. Сыры аяшак вэлмөмн иса пүш велласлэты па хүл велты яңхман вэсум. Аршак яңх-



▲ Айлат ёх лух лэмэтдэт. П. Молданов веरум хурат

лэн, шэшийлдэн, ёлэн тэланца, ѿма тэйлэн. Щи пата щи ма тэм тэхета юхтыйлдум, тата эмэш мир пела вэнтты, тата пираш веरен иира хэтд па щи хэя-воя вэлум веरят нумаса питдэт. Ма кимэт пүш нымалн касты тэхийн кассум, мэт олдэн пүш ветмит тэхия питийлсум.

Касупсы етшум артэн Кирилл Равильевич Минулин па щи јм ясэн мир пела путартас:

» Мүчева веера мосл ийс веरлув ѣн юрэмтэй, щи веरят лыги нумасн па сэмн тайты мосл. Муй веरят мүчева тум тэрума

мэнум ийс ёх хайсэт, муй лыв мүчева мойлдасэт, щи веरят елды тэты мосл. Щэлта па щи веरят ийлупа ёнумты айлат ёха юканты мосл. Касум ёха ма вэн јм вүща ясэн луплум, нын каркама, ѿма кассаты!

Нымалн касум хэтлэвн Тэрум ашев ар щира кэрлдас, хэтлэн хэтла вэс, пэлдэн тэрум вэс, тэп ишмурт касум хуялтүв па щи пела вантум мирав јм нумасн, јм сэмн юхлы пела мэнсэт.

Путэр хэншас:
Пётр Айев



XXI-МИТ «Най Аңки» олăнъан айкел вëрсäт

Ай кëр тылăш хälмит хätäлн Ёмвошн РИЦ «Югра» айкел äкäтты тäхи хуша арсыр кäщайт ияха вäйтантыйлсäт па «Най Аңки» нëмуп сыр-сыр кинайт ванлтäты XXI-МИТ ёмäñхätл вëрт олăнъан путäртсäт.

Тäм пүш Россия мүв па 16-кëм па хон пелкät эväлт арсыр кина хурат Ёмвошн ванлтäсыйт, щит Индия, Китай, Боливия, Бразилия, Чили па па утät. Кинайт вантты тäхетн вэн кäщайта Павел Лунгин па Алексей Мизгирёв ияха вëснän, мүвтél, мир ёмäñхätл, кäщая Эмир Кустурица тäм олн пирысы.

Тäм вулдац мирхотн вëсäт: округев кäща лänkär нë Елена Шумакова, Росконгресс тäхи кäща лänkär нë Елена Маринина, Мүвтél мирät кинайт вëрты XXI-МИТ «Най Аңки» ёмäñхätл кäща лänkär нë Мария Зверева, ай няврëмät пäta мосты кина хурат лëштäтты тäхи кäща нë Екатерина Бордачёва, Чили хон пелäк эväлт тыв юхтум режиссёр нë Александра Фритис, Китай хон пелäк Ван Чун па Ся Цзянькуй хäйнäн, Индия хон пелäк мойн хë Махеш Дананнаавар па Россия хон мүв кина хурат арталäты тäхи кäща хë Пётр Шепотинник.

Сырыя ияха äktäшум хäйннëхуятät елпийн Югра мүвев кäща лänkär нë Елена Шумакова лупäс, хуты «Най Аңки» ёмäñхätл тäм мänum 20 ол мäр мëт яма па ämäшäа йис. Тäмхätл лüв унтасäлн иса арсыр хон пелäк эväлт тыв юхтыйлты режиссёр хäйт мүн кина вëрты ёх-лüв ямсыева ар ширн венлтäлät. Щälta Россия



▲ Е. Шумакова мойн нëнät кütн. В. Енов вëрум хур

мүв ёх ишти лывел сыр-сыр ям кина вüты вëртäптура-пурайн вэнлтäты вëртäлт. «Най Аңки» ёмäñхätл ин тäмхätл, лüв ясäñдал ширн, мäтты ки академияя лüñtäсл, хута округев луватн вëлтäпти айдат хäйннëхäйт иши кина хурат тäса вëрты вэнлтäлыйт.

Тäмхätл мүвтél мирät кинайт ванлтäты ёмäñхätл мäнты пурайн «Россия мүв сäm – щит увас мүв» нëмуп хурäн ванлтupsы мäнты питл. Щимäш вэн алисupsы нëмасыя кина хурат ванлтäты хäйннëхäйт юхи хäйшум пурайн вëрсäт. Елена Маринина пурартум ясçät ширн, щит шëнк эмäш па тäс хурäн ванлтupsы, мäта утн тäп кинайт вантты рäхл.

Лüв юпелн Росконгресс тäхи кäща лänkär нë Елена Маринина лупäс, хуты тäмхätл лüв йилуп ширн арсыр кина вëрты

ширät лëштäлт. Щи пäta кашäн пүш щимäш мүвтél мир хäйннëхуятät пила ияха, и нумсätn па и вëртäпти рäпитты мосл. Росконгресс, лüв ясäñдал ширн, ямкëм арат ол мäр Югра мүв округ пила ияха сыр-сыр вëртäпти тäса, хурасäна вëрл.

Щи вëр тумпийн тäм «Най Аңки» ёмäñхätл мäнты пурайн «Россия мүв сäm – щит увас мүв» нëмуп хурäн ванлтupsы мäнты питл. Щимäш вэн алисupsы нëмасыя кина хурат ванлтäты хäйннëхäйт юхи хäйшум пурайн вëрсäт. Елена Маринина пурартум ясçät ширн, щит шëнк эмäш па тäс хурäн ванлтupsы, мäта утн тäп кинайт вантты рäхл.

Щälta Мүвтél мир кинайт вëрты XXI-МИТ «Най Аңки» ёмäñхätл кäща лänkär нë Мария Зверева ясäñ тäс. Лüв

лупäс, хуты тäмäш арсыр кина хурат ванлтäты ёх вäйтантupsы ѣнтä тäп Югра мүв пäta вëрсы, ин тäта па ар хон пелkät эväлт вëлтäпти хäйннëхäйт лüв кütäлн вäйтантыйлдäт, вëрлal па вëлupsы ширäлдäл олăнъан айкелäт тëлдäт, вещката вëллäт па ар вëр ияха хурамäңца па тäса лëштäлт. Вантэ, хëс ол мäр тäмäш вэн па хурамäң «Най Аңки» нëмуп ёмäñхätл Югра мүвн иса вëрты пиньшäсы.

Мария Зверева ясçät ширн, тäта ар ям кина хурат шивалäты вëртäлт.

Ёхät тäм вэн ёмäñхäytäлн Россия мүвев кина хурат арталäты тäхи кäща хë Пётр Шепотинник пурартäc, хуты лüв ям араткëм кина вантäc, и утлal – ямäт, кимит хурлal – вевтамшäкät. Тäмхätл иса увас мирлüв эväлт тäта сыр-сыр кина хурат ванлтäты питлыйт. Щитäлт лüв ямсыева уша ѣн па вëräc. Хëн кинайт ар пелäк эväлт арталäл, щи пурайн вëлчи лüв олçelн мултвы пурäртты вëртäлт.

Мëт юхи хäйшум кütн тäм мирхотн ай няврëмäт пäta мосты кина хурат лëштäтты тäхи кäща нë Екатерина Бордачёва айкел вëräc. Лüв пурартäc, муй ширн лüв кина хурлal айдат пухäta-эвета муй ѣнкилал-ашилалда нëтлät. Лüв ширälн, тäм ёмäñхäytäлн ишти яма вërum кинайт вëллäт.

Путэр хäйшäс:
Владимир Енов



Тата мосванән ай көр тыләшт хәлмит хәтәлн етна пәлка Ёмвошн «Югра-Классик» хотн мүвтөл мират «Най Аңки» ёмәңхätл дәштәтс. Щи пәта мүн увас мүвеве Россия па сырсыр па хон пәлкәт эвәлт иса мойн хәннөхүяттәт ияха ёктәшийлс. Լын күтэлн кинайт хуша юнты, режиссёра рәпитеты па кина вәрәт түңшириәнә дәштәтты хүяттәт вәсат.

Ёмвошн кинайң ёмәңхätл дәштәтс

Щимәш вәр пәта мойн хәйт па ненәт етна пәлка Вүрты нәйн ланкум ёш хүват нәмасыя шәшс. Щит Павел Лунгин, Сергей Гармаш, Юлия Пересильд, Анна Михалкова, Алексей Мизгирев, Лянка Грыу, Елена Панова, Елена Николаева па Россия па арсыр хон пәлкәт эвәлт иялуп кина хурат ванлтатыя юхтум хәйт па ненәт.

«Най Аңки» ёмәңхätләт айттшум хәннөхәйт ел-пийн Югра мүвев кәща ненәт Наталья Комарова лупас:

» Ешак хәннөхүяттәт, тәм нял хәтл мәр нын арсыр ийлуп кина хурат ванлтаты питтәт. Мүн ёмәңхätләв арсыр па хон пәлкәт күтн яма вәйтгә, щиты хәс ол мәр лүв вәл, рәпител. Шенк ләңхалум, ләлн тәм пүш ийлуп вәрум кина хурдан нух ат питтәт, олән тәхета ат юхтәт.

Округ кәща ненәев яснат юпийн Россия мүвев театр па кина хур хуша юнты хүтнән Богдан Кияшко па Юлия Пересильд китумтак айкеလတ вәрсәнән. Լын лупсәнән, муйсәр хәннөхәйт Россия хон пәлкәв эвәлт тәмхätл ёмәңхätләва юхтәт. Щалта па путтәртсәнән, муйсәр па хон пәлкәт эвәлт тәм пүш ийлуп кина хурат ләштәтум ёх айттшат. Россия хон пәлкәт эвәлт щимәш ийлуп кина хурат тәсыйт, щи күтн М. Мусаева «Клетка ищет птицу», А. Ермолин «Ниша», М. Кулунаков «Тропа», М. Лойтер «Как звёзды», И. Фёдоров «Выбор»

па Никита Добрынин «Мытарства». Мүвтөл мират па йилуп кина хур тәсат: «Клементина» К. Фельдманән вәрс. (Аргентина), «Нездешние глаза» Ван Чун (Китай), «Как актриса» С. Байи (Франция), «По обе стороны пруда» П. Саурбаха (Индия), «Параллакс» Ш. Саурбаха (Иран), «Торао» К. Мураямо (Япония) па «Узлы» О. Хамоков (Россия).

Мүвтөл мират «Най Аңки» ёмәңхätл мәнум пурайн па хон пәләк ёх айлат пухт па эвет пәта йилуп «Твоё кино» немуп хурат ванлтас. Тәм пүш хәт щимәш кина хур Китай, Иран, Индия, Боливия, Чили па Бразилия эвәлт тәс.»

Чили хон пәләк эвәлт юхтум режиссёр, продюсер па медиапедагог ненәт Александра Фритис округев айкеလတ ёкәттәт ёхлұва путтәртас:

» Мүн мүвеви, вантә, шенк шимл кина хур айлат хәннөхәйт пәта ин вәрлә. Мүвтөл мират кинофестиваль щикүш тайлұв. Тәп щитэв унтасн арсыр хон пәлкәт режиссёрт пила ияха вәйтантыйлұв, ямсыева нявлремт пәта кина хурат ләштәлүв. Тәм «Най Аңки» ёмәңхätләда ищити айлат ёх оләнән вәрум хурамән кина хур тәсүв.

Китай хон пәләк режиссёр хә Ван Чун щиты мүнцева путтәртас, хуты



▲ Россия мүв кина хуша юнты ненәт Лянка Грыу Вүрты ёш хүват мәнән



▲ Индия хон пәләк мойн ёх. В. Енов вәрум хурнән

Ёмвошн тәм күтн шенк ар лоныш питмал па ям арат ай нявлрем вантмал. Լүв ләңхал, ләлн йилуп кина хурал ай пухт па эветн сәмәна ат вантсы па ушанда сашшана ат вәрс. Щи хәев «Мороженое со вкусом сладкого картофеля» немуп йилуп кина хур тәс. Индия мүв эвәлт юхтум мойн хә Махеш Даннанавар нәхмәс, хуты лыв хон пәлкел па Россия мүвев күтн ар оләт мәр хәннөхүяттәт ямсыева па иса вешката вәлдәт па сырсыр вәрәт ияха тәса

ләштәләт. Лүв ләңхал, ләлн «Ганди и компания» кина хурал, Югра мүвн вәлтә хүяттәт ямсыева ат вантсы. Тәм хәя әмәш ёмәңхätлән вәлтә па арсыр хон пәләк хәннөхәйт пила вәйтантыйлұт.

Щиты ай көр тыләшт хәлмит хәтл вүш эвәлт па хәтмит хәтл вәнты сырсыр тәхет эвәлт түвум йилуп кина хурат мүвтөл мир ёхлұвн ванлтасыйт.

Путэр хәншас:
Владимир Носкин



Сәрханл районан вўлەн ёха



▲ Нух питум хә Д.Б. Комтин



▲ Вўлы әхäл сора хәхäл

Ай кәр тылäщ 18-мит хäтлän Сәрханл район Русскинская кәртäн вўлы лавäлты, вой па хўл велпäслäты ёх äktäshiylläst. Лыв пätэла вән ёмäнхätl лэшäтс. Лыв вән хоттөл ёх иты күтэлн ләхсäна, яма вәллät. Исäт хурамäн хäнты лämätsuhx юхäts. Няврэмäт па айлат хуятäт пиräш имет па икет эвäлт йис вәрәт олänän уша павätlätn. Кашäн ол товийн лыв щиты вәйтантыйлдäт, ёмäнхätl лывела амäт па уй тэл.

Тäм пүш ёмäнхätlä вет щурäскем мойн хуят юхäts, щит ванän вәлты вәнт шушет, кәртäт па вошäт эвäлт юхтum хуятäт. Рүщ ёх щäta хäнты мир вәлупсы, йис вәрлäl олänän уша павättty щир тäysäts. Сәрханл район кäща хә Андрей Трубецкой юхтum ёха ям вўща ясäн лупäc:

» Тäм ёмäнхätl округен

вуланä тäйly, ар тäхетн вәлты ёх щи олänän иши вәйтlätn. Мет эмäш вантty, хэн хäнты ёх вўлëн әхätlätn күтэлн кäslätn. Щи кäsupsyя лыв ол мär лэшätyiylätn. «Сургутнефтегаз», «Лукойл-Западная Сибирь» па па мүв илли тащ вўты тäхet кäshäjäta вәn пämäshipa ясäн луплum, лыv мүн ай кәртлүv хурамäna вेरты, щимäsh ёмänхätlätn веरты нётlätn. Кästy ёха лупlum,

йма, ёрäna, каркама ат кäslätn, мет ёрäн хуятät нух ат питлätn!

Мойн ёха Сәрханл район дума кäща хә Валентин Полторацкий, внутренней политика департамент кäща Александр Скурихин, «Лукойл-Западная Сибирь» тäхийн рäпittы хә Константин Беляев вўща ясät лупsätn. Щи тумпи Рускинская кәрт кäща хә Андрей Соболев путärtäcs:

» Эмäsh, хуты мүн кәртäva щи арат хуят юхätyll, лыv тäta вәлты хänты мир йис вәлупсы олänän уша павättty лähçhalätn. Тäm мүvн ветъяñ ол мär щимäsh ёмänхätlätn веरäntly, кашän ол щit ямашäka па хурамäna йил. Тäm олн мүн ёмänхätlätn веरты щира хурамäna rütyäshäty xäp omässv, щит мүv илли тащ вўты ёх па кäща ёхлүv унтасн тывäc. Еллы олätn па щи тив юхтäty!

Щи хätлän нивл щосн вўлëн ёх лорн äktäshäts. Ияха ки лүhättty, кäsupsyin 50 хуят кäscä, щит 35 хә хуят па 15 ne.

Мет олänän хәйт вўлы юпийн нымäldn хәхälmätn кässäts. Арталätn ёх кäща Зинур Айнуллин лупäc:

» Тämхätl нивл щосн вўш эвälт вўлëн хәйт нымäldn лöльман вўлëtn юпийн хәхäläts. Щи юпийн мүñeva финал веरты мосäc. Тäp мүn уша павätsv, лорн йинк нух питты олнитäc, щирn мүn алäñän kästy vеr хүват нух питум хәйт пирисv. Мосл лупlty, ма олän püsh шивалäcsum, хутыса яма па тäsa вўлëtn кäsupsyя лэшäts. Тäp kät püsh вўлы әхäl старт эвälт йира мäñäc. Вантэ, вўлëtn ол мär вәntätn вәlätn, ин щи арат хännexä шивалäcätn па пакäntäts. Хännexäyt хоккей юнтätn иты шенк сыяна ўвлätn, тäta щиты ўвты ѣн рäxл.



▲ Хänты хә хуятäty



кät «Буран» мойлäсы

Щи кäсупсыйн олän тäхия Виталий Леонидович Вылла йис, кимит – Леонид Борисович Комтин, хäлмит – Алексей Анатольевич Русскин.

Щи юпийн хäнты ёх вüлөн əхлätн сора хäхäлман kässät, мëт олänän – хäйт, щи юпийн – нëңäт. Щälta арталäты ёх лыв кütäлн вет вüлъи əхäл пирисäт. Щи ёх ешавäс «Массовый старт» щирн ияха kässät. Имет кütн мëт вüлän мойлupsы – щит «Буран» тütäñ əхäл – Зоя Павловна Русскина холумtäс, лüв олän тäхия йис. Кимит тäхия Лидия Алексеевна Покачева йис, лüв хопäñ моторн мойлäсы. Нина Еремеевна Тэвлина хäлмит тäхи пäта ёнтäсты щüñkän мойлäсы.

Хäйт кütн Денис Борисович Комтин вüлъи əхäл мëт олänмит финиша юхтäс, лüв иши «Буран» əхäлн мойлäсы. Кимит тäхи Леонид Борисович Комтин холумtäс, хопäñ моторн мойлäсы. Хäлмит тäхия Иван Борисович Покачев йис, тüt юх эвätты щüñkän мäсы.

Щи юпийн имет па хäйт хäнты лämätsuhн сора күрн хäхäлман kässät. Имет кütн Наталья Борисовна Сопочина нух питäс, кимит тäхия Лидия Покачева йис, хäлмит – Екатерина Вылла. Хä ёх кütн олänмит финиша Святослав Эдуардович Анагуричи юхтäс, кимит – Леонид Яковлевич Тэвлин, хäлмит – Алексей Покачев.

Щи тумпи хäйттынщац вала тäхман, əхäл шäпи навäрман kässät. Тынщац тäхты вëрн Валериан Леонидович Покачев нух питäс, кимит тäхия

Николай Львович Айваседа йис, хäлмит – Сергей Викторович Мултанов. Əхäл шäпи мëт каркама навräс Святослав Эдуардович Анагуричи, кимит тäхи Виталий Степанович Мултанов вüс, хäлмит – Леонид Борисович Комтин.

Мëт хëв мär хäйт ёрашты вëрн kässät. Щäта 67 хуят əр ванлтäсäт. Етн пëлка тäп хурамäñ хäнты лämätsuhн нëңäт, хäйт, няврëмäт ёмäнхätl, хäрн хäшäcäт.

Мойн ёх ищкийн потсыйт, иса юхи мänsäт. Камн ищкийя йис, вот шëңк пулäс, тäп хошум хäнты сäxähtn хännhäxuytatä кästty вëрн elly vantsäт.

Əraшты вëрн арсырвес тäйтты хäйт кütн Константин Мултанов, Виталий Мултанов па Кирилл Лозянов нух питäт. Вüлъи лävälty ёх тäхи кäsha xä Stepan Kechimov ёmänhätl, purain käsupsyin kästty mët aylat па mët piräsh хуятäta išäk nëpékäт па мойlupsäт katluuptäс. Lüv щи хätläñ нух питum хуятäta ям па хошум яснäт lüpäc:

» Тämхätl kästty вëр яма мäñäc. Сыры мүñ тäta kashäñ ol käsupsy вëräntcüv. Əxätl olätn пандемия пäta щимäşh käsupsy äñ вërcüv. Täm olñ иса käsupsäт вësäт, щит ям. Сärxanl районäñ мüv ilgili таш холумты мëт ар тäхи räpitil. Lüv вënt шушетн иши нефть нух вüldäт. Вülèñ ёх лüv пилзэл яма вërläт, кütäln kashahty nëpékäт хänhäjiläт. Щирн нефть вüты ёх хäntäta мосты вërätn hëtäл, щи тумпи tämäşh хурамäñ ёmäñ-



▲ Икет күрн хäхäлман кütäлн kässät



▲ Хäнты нëңäт käsupsy vantsäт. N. Рагимова вërum xuräт

хätläт лäşättty па нух питум хуятäta тынäñ мойlupsäт лättty nëtäл. Вën pämäschipa лÿvelä.

Мосл лупты, ёmänhätl, purain хätl мär хänты па вухаљ эвет якäт па ariсäт. Тыв ємвош эвäлт хänты aräт ariпty në Vera Kondratjeva па «Хätl» Ac-ugorskoy teatr ёх юхтыйлäт па иши ariсäт па якäт. Вën тыныты хäр räpitäс, мойн ёх щäta вüлъи нюхи, хüл, воньшумут, хänты лämätsuh, ай хурамäñ purmäcäт, näй па сух лättty щир täysäт.

Щи тумпи ар хуят «Музей природы и человека им. А.П. Ядрошникова» тäхия лунтыйлäт па хänты мир йис вëlupsy олänän уша павätsäт, щив лунты щира камн ар хуят очередян дöльман вëс. Щи тäхи äntä тäп Югра мүвевн, па мүвätн вëltty ёх иши вëlät.

Щиты яма па эмща вüлөн ёх, вой па хüл, вëläslästty хуятäт ёmänhätl, Сärxanl мүвн мäñäc.

Путэр хäñhäc: **Надежда Рагимова**



Ай тохтур нө Корлики кәрт эвәлт

Тәм ванән мүң редакцияева Корлики кәртәң нө Оксана Гавриловна Кунина Арина эвиел па Василиса хилненеиел пила мойңа юхтыләс. Мойң нө эвәлт вәлупсәл, рәпатаиль па арсыр вәрәт оләңән иңшәссум.

Мет сырьы лўв ай пурайл оләңән путартас:

» Ма ай кәр тыләщ 1972-мит одн сәма питсум. Мүң семьяевн вет нявләрәм вәс: кәт эви па хәлум пух. Мүң Гаврил Иванович Кунин ащев па Мария Кирилловна (эви опрашнәмл Прасина вәс) әңкев пила Полька похл (Полька юхан хонәңән омәсты кәрт) вүт кәртәң вәсүв. Щата вўлды тайсув. Юлн тәп хәнты ширн путартсув.

Нивл ола ювмәмн Людовь Егоровна Тарлина (Кунина) упемн әшколая тәссыум, од мәр нулевой классан рүщ ясән вәнләтәсум. Щи пурайн интернатн сот мултас нявләрәм вәс. Әшколая тәтъяты шира тухләң хоп ар пүш вүт кәртәта яңхиләс, тәп мүң кәртәвн 12 нявләрәм вәс.

Елды Оксана Гавриловна лупәс, муй ширн ай тохтура йис. Хән лўв тәп нивл класс етшуптас, щи лўңән Ёмвош медучилиштән вәнләтүлүм эви Анисья Прохоровна Каткалева рүттәштән юхтас. Лўв щи вәнләттән тәхи оләңән непекәт тәс па вән эзвета мәс, Оксана иши щи непек вүс.

1988-мит одн Оксана 8 класс яма етшуптумал юпийн Люда Прасина па Света Андреева кәт пил-ненеиенәл пила түтәң хопн Нижневартовска, щалта Ёмвоша мәнсәт. Щиты нәмәлмәслә:



▲ О.Г. Кунина Арина эвиел па Василиса хилненеиел пила

» Тыв етн юхтасув, меду-чилища вәлтү-холтас хот вәйтасув, щата хот йиттәт дәштәтсыйт, тәп комендант нө Зоя Антоновна Турулайнен мүң пәтәва атәлтхотийтвәйтас. Щата мүң һаптәт хәтл вәсүв па экзаменәт мәсүв, щалта сүс вәнты юхи мәнсүв.

Ай тохтура вәнләтүйләтү пурайн мәт пәлтап – щит морг хуша яңхты. О.Г. Кунина лупәс, хуты лўв хущела 48 хута вәнләтүләс. Оләңмит пүш щив яңхман 10 процент арат хута йира мәнсәт, ёхтәт тәп 28 хута непекәна йисат.

Вәнләтүлүм пурайн лўв икел пила вәйтантыләс, щиты путартас:

» Ма пилема Угут кәрт эвәлт эзвет вәнләтүйләст, лўв лупсәт, хуты щата Вячеслав Каюков айлат хә вәл, адресл мәсәл. Ма лўвеңа пищма хәншум, лўв юхлы непек китәс. Щалта Ёмвоша юхтас, и нумса юхтасум – непекәна йилум – Угут кәртәт рәпитеттән мәнлүм. Щиты щи

хәлтас па вотас тыләщнән 2021-мит ол – мәт һавәрт пурас вәс – кәртәң мир ийлуп коронавирус мәшн мәшиштә питсат. Щи пурайн хәтл мәр кәт пүш тухләң хоп вохантсув. Тәньял кәт кислородной концентратор ўйнкәнән тәссыов. И хута коронавирус мәш эвәлт фиброз турәх мәш тайты питас, ширн иса пурайн кислородн әләтти мосл.

Оксана Гавриловна икел пила хәлум нявләрәм тайл: вән Александр пухл Излучинск вошн вәл па әңкел иты тохтура рәпитет, кәт нявләрәм тайл. Кимит Иван пухл Сәрханл университет етшуптумалн инженера-эколога йис, ин Ярославль вош пүңәлән армияйн служитл. Хәлмит Арина эвиел кимит классан вәнләтыйл. Айтедн юлн нявләрәмт хәнты ясән хәләнтәт, ширн шайкәм ясән тайлдат. Рүттәштәти пурайн вүт кәртәла яңхләт, ин щата Василий яел вүләт тайл.

» Тәньял лўңән Красноярской мүв хуша вәнт түтн ёссы, ширн вәнт вүләт мүң хущева юхтасат па мүң вўлышлуб воханттас питсат. Яём таш эвәлт иши ар вўлды вәнта мәнсәт па юхлә ән кәрләсат. Щи тумпи юхи хашум оләтн пурвой ара йис, щит иши вўлән ёх пәта вән нүша.

Корлики кәрт вәлупсәл оләңән путартты ки, хулна сотовой связь па Интернет вевтамнән. Тәх щосн онлайн ширн кәшайт эвәлт нүшайт оләңән иңшәстү ән вәрітлуб, – юхи хашум артән Оксана Гавриловна Кунина лупәс.

Путар хәншас: **Людмила Гурьева**



Касум вош пәльнициайн ай тохтур имия Надежда Алексеевна Негодяева (Каксина) рәпитл. Лўв тәм вошн сёма питäс, ащел шәнät Алексей Ильич Каксин, Касум вош хә, ўңкел Нина Петровна айтөлн шәкашты няvrëma хäшäc па вәнт кәртән Алексей Михайлович Молданов акел хуша ёнмäс, вәnlтыйлмал мärн интернатн вәс. Тәм Касум вошн икел пида вәйтантсäнän па ѿха мänsäñän, хәлум няvrëm ёnмälsäñän.

Надежда Алексеевна пилäң няvrëm вәс, Люба упел пида и хäтдän сёма питсäñän, лын нё-мäscäñ.

Ўңкел Нина Петровна вәлтәл нәпäт Касум пәльнициайн ай тохтур имия рәпитäс. Щи пäта Надежда Негодяева ўңкел шәшум пänt елды тәты нумäс верäc па 2001-мит олн ємвошн ай тохтурäta вәnlтыйлты мäнäc, ин щи тäхен немл ємвошäн государственной медицинской академия.

Щäta лўв вәnlтыйлдас ай няvrëmat сёма питты тäхийн нёttы щира, рўш щирн акушеркая. Вәnlтыйлмал мärläñ икия мäнäc, няvrëm вәйтäс па ёхätшäk елды вәnlтыйлдас. 2008-мит олн вәnlтыйлты тäхел етшуптäслэ. Мет оләñän Нуви сäñхум вошн рәпитты питäс, щит Белоярской районной пәльница хуша. Щäta ол мултас лўв пёñкäт ямältätyt тäхийн ай тохтура рәпитäс. Щälda па Касум воша рәпитты вохса, щив щи рёт вошäla мäнäc. Щäta rәpitäc ай апайт сёма питты ай тохтура па регистратура хуша, щи юпийн па ёх ямältätyt ай тохтур рәpatая питäс. Тәм вәnta щäta щи rәpitl.

Ма иньшässäm, муй пäta лўв ўңкел шәшум пänt хүват мäнäc. Надежда Алексеевна путärtäc:

» Ўңкел иса пүш ясäñ тäyc, мättы лўв айтөлн ай тохтур имия rәpitl. лäñchac па щи тäхия вәnlтыйлты мäнäc. Щи юпийн па иса пүш Касум пәльнициайн rәpitäc. Лўв щи мänenma ясäñ lüpäc:

И пänt хүват шәшлät

«Надя, нäң хүты иши ай тохтурärt вәnlтыйлты тäхия мäna».

Па щи, ма щив щи мänsum. Хән ма худна садика яñxsum, мүç партсаюв хур хäñshты, муй тäхийн мүñ rәpitlty kash täyläv. Мултас вўр щирн ма ай тохтур ими хура хäñshsum, щи ими пуртәn päxhupsys vërtys shpriç ёшн катäl. Алла, щит ўңкем rәpata vантыйлsum. Па щи, хäñshum vërem ин щи ѹинмäc. Любашев па няvrëmat вәnlтätyt тäхия вәnlтыйлты мänäc.

Щиты щи Надежда Алексеевна ўңкел шәшум пänta питäc па ай тохтура йис.

» Рәpitlty питmëm юпийн, – елды пүтäр тәл ай тохтур имиев, – эвиэм ѿнмäc, ўшкала етшуптäc, ма лўveda ўңкем lupum ясäñ елды павärtcsem. Щи lupsuм: «Ай тохтур имия вәnlтыйлты мäna. Щит хүты нäң няниен питл, хäñneхäyt иса пүш mäshitlät, яmältätyt ай тохтурärt vëra moslät, pуртәn päxhupsys vërtys хота вохлаюм, вәna ѹivum ёха иса пүш пәльнициая яñxты лävärt. Ма щи ёх эвält щи kүш vux ўң вўlum, iшimurt лыв мäntы mävän па мултас єpläñ utn лапättlaюm, mälyum. Эвэм, mosäñ, па нумäc тäyc, тәp ин Kristinaeñ ma вәnlтыйлтum пäntemä doljas, ин лўv Сэрханда вошн медицинской кол-



▲ Н.А. Негодяева пухäл пида

ледж хуша кимät ол вәnlтыйл. Эвэм ай тохтура вәnlтыйл, щи күтн па косметолога йиты тäхия па яñxäl, лўv мир хурамлтätyt нумäc тäyl.

Савелий ай пухëm па худна ўшкала няvrëm, вет-мит классäñ вәnlтыйл.

Лўv пүtärtäc, муйсäp нумäst па тäyl, муйсäp вेरät лўveda emşäñ. Мәшä ўң йиты пäta лўv kashäñ алäñ вош хүват хäñtälyä, kästy täxet kи вошн веरäntläj, иса пүш ёх пила käsl, ГТО веरät иши яма веrläldz. Па якты-ариты тäxeta яñxты лўveda emäñ, иса пүш концертäн яkäl-arayil. Лўv вेra каркам ими, ям нумäsn, ям сämn wäl. И веp тәp шäk, ўңкел-ащел тäyom хäñtäy ясäñ ўң тäyl.

Вәnashäk юvmal юпийн иса пүш щи оләñän nämäsl, айтөлн хүты ўң пүtärtäc, садикät хуша иса пүш rүsh ясäñ. Ин ўңкел тәх щос щи kүш мултас хäñtäy ясäñ lüpäl, пälñäla па ўң сашл, щи пäta ўңкел rүsh ясäña павärtäsl.

» Ma ясäñ ўң тäylum, няvrëmä, хидылдам ясäña хәn питlät, щит веra atum, щит веra шäk, – пүtärtäl Надежда Алексеевна.

Щи пäta лўv веra лäñxäl, хäñtäy ясäñ тäyty ўңкел-ащет няvrëmäл пила юлн хäñtäy ясäñän at пүtärtlät. Щирн тәp хäñtäy ясäñ ўñäl pünshum ясäña йил.

Путär хäñtäy:
Пётр Молданов



Ай көр тыләш 13-мит хәтлән Ёмвошн «Торум Маа» хотн вәйтантупсы мәнәс. Щата Юрий Кылевич (Вэлла) Айваседа оләнән нәмәлмийлса, лүвела ләлн 75 ода йис там ол, ищиты па лўв хәншум нәпек стихлал, путәрләл оләнән путәртсät. Щив ләхәсләл юхатсät, щи тумпи видео хўват Варьёган вош эвәлт Ю. Вэлла рәт ёхлал пила путәртты пищел вәс.



▲ Ю. Вэлла хотән ёхлал пила



▲ Ю. Вэлла оләнән путәр хәләнтләт. Ф. Молданов вәрум хур

Сәм дыпийн ар

Эвәл ащел оләнән путәртс, муй вүрн лын ӓңкел пила вәтща вәйтантсәнән. Лўв нявләла па хилылала юрн па рүш нәмәт мийляс. Вән эвәл Тайна юрн нәм тайл, мүң хәнты ясчевн питл «Хәния». Щимәш лўв вәс, щиты лўвты нәмлә нявләлән. Лўв ар нәпекәт хәншиләс. Варьёган вошн кät ванлупсы хот вәл, и хот эвәл вәрас, кимәт – этнографической парк-музей хот – лўв ләштәтс.

Юрий Вэлла иса мир пила йма вәс. Хән сәма питтәс, ищи лўвты кät йис опраш нәмн пуныйлса, щит Вэлла па Айваседа. Йис Вэлла опраш нәмл нәпеклән, кинишкайдалн хәншиләс. Լавәрт вәлупсәл, ӓл нәмлә, елды вәлты щира партыйлса.

Николай Заболоцкий, рүш ясчан хәншты стихат ики, щимәш ясчәт тайл:

» Лўв ям вәрт вәрас, тәп атәлт щи пäта йма па тәса лўв олңадлн лупса. Увас

юрнат апраңт па тәс щира вәлты хошләт, лўв йис вәлупсы түвман шуши ёх щирн вәрт ләштәтс. Щи пäта лўв олңадлн лупийлса и хә хәннәхәйт күтн.

«Торум Маа» хотн рәпитетты не Майя Макарова лупас:

» Там вәйтантупсыйн Юрий Вэлла сәма питум хәтләл вәс. Лўв стихл хуци тәмәш ясчәт вәсät «Сәм дыпийн ар». Вәлмәл нәпәт нәпекәт хәншас па мира нәтәсман вәс.

Лўв кинишкайдал лўнättти йина լавәрт, ар пүш мосл лўнättти, щи юпийн велчи түнматты пищ вәл. Мәнәмә «Аган» нәмуп киника шенк сәма хойс. Щата лўв лупиләс, муй вүрн Аган юхан нух дыләнләл, ищиты памтыләс, щи юхан пўнадлн ар ай юханат, вәрет увләт, щата рәт мир вәсät, ищиты тәм хәтл вәнта ёх вәлдәт. Лупиләс, муйсәр мүвәтн рәхл муй па ӓн рәхл рүш ёха мүв илпти таш кәншты. Там кинишкайл щи оләнән

щи хәншман, хутыса мосл ѿма, тәса рүштәт пила вәлты.

Ищиты педагогической наукайт кандидат Е.А. Немысова щата вәс па ясчн тәс:

» Юрий Вэлла пила ма 1990-мит оләтн вәйтантыйлсум. Ёх лупийлсät, лўв ар вүх па вән таш мәттү тайс, лўв нәмәлт ӓн тайс. Шимл вүлдәт эвәлт мосл ар вўлды һәмәлтү, щирн ташчана пищ вәл.

Лўв шуши мүв па вўлды щәхрәт пäта һәтәс, рүштәт ләлн щи мүвәтн ар рәпитетт. Лўв вәра ләнхас, юрн ёх лыв ясчел ар юрәмәсәл, щи пäта хәншас арсыр путрат, муй вүрн юрн хәннәхә путәртәл па вәрт вәрл. 1980-мит оләтн лўв стихлал мирн шивалясыйт, щирн ма «Нуви һоньш» нәмут стихлал уша вәрсем. Щи ясчәләл хәнты щира вәрсайт, мәнәмә әмәш вәс лўнättти. Ма ар пүш яңчум лўв вәнта кәртәла, лўв хилыләл хульгева вәлдәм. Щалта ар хурат тәтъясум, тата вәнлтыйлты тәхийн ванлтаслам айлат ёха па лупсум лывелә: вантаты, муй вүрн юрнат вәлдәт.

Хән вәсум лўв рәт мүвәлн, щирн тәлн лўв вәнта вәнлтыйлты хот оләнән лупиләс.

Щи вәйтантупсыя Асугорской институтн рәпитетты хә Александр Семёнов мойна вохса па Ю. Вэлла оләнән инышассем:

» Лўв ушхүль ики вәс, лўв щирлән тәрум пела вантас, ѹкан щирлән вәс. Мәнәмә лўв пиләлә լавәрт вәс путәртты, ищипа вәра ар нумәс тайс, вәслә, муй вүрн լавәрт мира вәлты, ясчел ӓлән ал вәшәс, ёх йис вәрләл ләлн ӓн та-рупташл.

Юрий Вэлла 2013-мит олн лыпәт хойты тыләш 12-мит хәтлән ӓнтәма йис. Лўв сырлы Ёмвош мүвн ѹкан вўлды таш митра ләштәс, сырья вәнта кәртән вәнлтыйлты хот пүншас. Шуши мир ёха арсыр вәртән нәтәсты питтәс. Ар хәншум нәпек мүңева хәйс, щитат мосты щирн па яма ләрамтты мосл. Муй пäта тәм мүвн мүң вәллўв па муев мүң ѹпевн хайлўв!

Путэр хәншас:
Фёдор Молданов



Геннадий Райшев оләң хурăт



▲ Вишнёв мир ванлупсыя юхатсат



▲ Е.А. Немысова Г.С. Райшев оләңдән путэртэл

Ёмвошн ай көр тылдышн 2-мит хәтлән Г.С. Райшев хур хәншты хотн вәйтантупсы вәс. Щит нәмл «Сыры хәншум хурăт. Лўв юкан хурас пәнтәл». Щи ванлупсыйн лўв мәт сырь хурдал, вәсät, художественной ясäн па юкан хурасат пүншäс.

Мет оләң лўв шуши ёх күтн Россия мүв хүваттыйн 1970-мит оләтн щимäш хурăт хәншты питäс, щит тәрум, мүв па йинçк вўюм хурасдал, арсыр олюопн нерум хурдал. Ищиты мүн йилуп щурас оләвн лўв Ёмвош мүв шуши мир оләңдән хурăт хәншäс.

Там иис рәпаратайдал мүв-йинçк оләңдән хәнш-сälэ. Лўв ар пүш тәрум юхан мүввата яñхäс па щäта «Угут», «Желтоглазые юганки», «Свет над лесом» нәмуп хурăт хәншäс.

Хәншум хурдалн ванл-тас, муй вўрн лўв нумсäлн мүн вәлупсэв тайсäлэ, мү-вев-йинçкев шиваалыäс, щи пäта па хуята щиты пиш ѣнтә шиваалыты. Щи пäта лўв ар хурăт хäйс, щи хурдала там иис оләтн ар ёр па нумас пунылäс.

Сыры хәншум хурдал, хот йитн щи тাখийн ёх нәмийлда па рәпаратайдал вантлайт, илампа щи та-хең хулңа щи рәпитетман вәл, щäта пурмäсдал, непеклал, хәншты юхдал Карпинска вош эвәлт тәтьляслэ. Хурăт вәрты хә

ВӘЯТН ЩИ ОЛӘҢДÄН

Геннадий Степанович Райшев 1934-мит олн кät юхан Ас па Салым вәтща увты тাখийн, Сивохребт вошн сëма питäс. Ар оләт щи тাখетн велпäслäсäт, хүл катälсäт – шуши хäнты рәт Райшев па рүш Конев ёх щäта вәсät. Г. Райшев ая вәлум олдал лавäрт вәсät, ащел 1937-мит олн Манстар воша тәсы, вәнлтыйлты та-хең вуцкäслэ, щи пурайн даль тывäс, лўв нётäсты, вой-хўл велпäслäты питäс. Щи мäнум оләтн оләң хурдал хәншилäс.



▲ Г.С. Райшев хәншум хур



▲ Айлат ёх хур вантлät. Ф. Молданов вәрум хурăт там ванлупсыйн вәлтвы рәпаратайдал иши щи вошн хәншилäс.

Тамäш ванлупсы там ол ван хатлуп тылдыш 28-

мит хәтл вәнта рәпитетты питл, кашäң хуят Галерея хота яñхты пишл вәл.

Путэр хәншäс:
Фёдор Каксин



«Калевала» йис путэр шәпие 20 ясәңа тулмащтасы

Вотас тыләш 28-мит хәтлән 1835-мит олн Элиас Лённрот «Катра Калевала» нәмпи карело-финской йис путэр хәншәс, щирн щи хәтл «Калевала» хәтла йис. Тәп 1860-мит олн щи хәтл постәты олңитсы. Вотас тыләш 28-мит хәтл – щит кареләт па финнәт вәлупсы хәтл па финской вотвой хәтл. Тәм хәтлән Карелияйн па Финляндияйн «Калевальской карнавал» ләштәлү, щив арсыр тәхет эвәлт хурамәң ләмәтсухәтн финнәт па кареләт юхтыйләт па «Калевала» нәмпи йис путэр лўнәтләт, ариләт, якләт па етнхот альләт.



▲ Щи айлат ёх пида «Калевала» путэр лўнәтсүв

Ипүш 2017-мит олн ма па хон пәләк Финляндия мүв Хельсинки хон воша щи ёмәнхәтла мойңа вохсыюм. Щи пурайн ма шиваңасум, муй щирн айлат ёх «Калевала» йис путэр пәта тәм йис вәлупсы оләңән ар хәншәтләт па ариләт.

Тәм олн «Центр финского языка в Карелии» па «Suomi-kerho» (Беларусь) нәмпи оса тәхенән ёх «Калевала» йис путэр сашл» нәмпи вәр ләштәт. Лыив шенк дәңхаләт, ләлн тәм карело-финской йис путэр арсыр ясәтн ат сашл.


Югорской государственной университетн айлат ёх финской ясәңа вәнлтәты нә Марианна Семёнова (Андуганова) мәнәма па «Луима сәри-

пос» газетайн рәпитеттә нәча Тамара Меровая иши щи вән йис путэр эвәлт и пүтрые хәнты па вухаль ясәңәна тулмащтәты партас. Мин тулмащтасемн па лўнәтсемн.

ЮГУ хуша вәнлтыйләтә айлат ёх иши английской, немәш, французской, марийской, украинской, хәтань па башкирской ясәтә тулмащтасыт па лўнәтсәт. Щи тумпи пәләлә ёх пәта сурдоперевод вәрсы. Па хон пәләк Литва па Финляндия мүвнән ёх иши тулмащтасыт па лўнәтсәт. Ийха лўнәттә ки – «Калевала» йис путэр хәс ясәтн лўнәтсы.

Тәм вән вәр тәтә ёха карело-финской лўнәттә ар иты тулмащтәты мосл.

Әхат щи вәр оләңән ай кина етәс, щата «Калевала»



▲ «Калевала» нәпек,
www.linguacontact.ru сайт
эвәлт вўюм хур

йис путэр шәпие арсыр ясәт хәләнттә рәхл.

Хән щи вән рәпата вәрсүв, вотас тыләш 25-мит хәтлән онлайн щирн «Калевала» йис путэр сашл» нәмпи ёнта пәсан ләштәт. Арсыр мүвәт эвәлт күтәлн 60 хүят вәйтантыйләт па путәртсәт.

Тәм вәр ләштәттә катнән – щит Белоруссияйн финской посольствайн рәпитеттә, МГЛУ хуша айлат ёх финской ясәңа вәнлтәты нә Ольга Ризмакова па Карелияйн финской ясәңтәхи кәща нә Татьяна Исламаева вўща вәрман ястасчән, хуты 2022-2023-мит оләң – Россияйн мүвтөл шуши мир рәт ясәт оләң, щирн «Калевала» йис путэр тулмащтәты вән рәпата ләштәт. Мосл,

ләлн финской ясәң пида рәпитеттә ёх и нумәсн ат вәсәт, йис путэрт ат тулмащтасыт. «Калевала» вән йис путэр арсыр ёх тулмащтасыт, щит няврәмәт па айлат ёх вәнлтәты хуята, ясәт ләрамтты ёх, айкеләт әкәттә нәнат па хәйт, культура вәрт тәтә па оса тәхетн рәпитеттә хәннәхүяттәт.

Ёнта пәсан пурайн «Калевала» йис путэр тулмащтәты вәр па щи вәрн тывум нүшайт оләңән путәртсыйт.

Санкт-Петербург вошн няврәмәт финской ясәңа вәнлтәты нә Юлия Аревкина ай кина аляс, муй щирн айтәлн няврәмәтә «Калевала» йис путэр лўнәттә. Щи тумпи лўв вәнлтум няврәмәләт тәм йис путэр оләңән хәншум хурамәң хурат вантсүв.

Щи тумпи тәмхәтл мүн Ирина Шишканова «Калевальская руна» ар хәләнтсүв.

Юхи хәшүм артән ёнта пәсанан айкум мир лупсат, хуты «Калевала» карело-финской йис путэр еллы тулмащтәты мосл. Әхат мүн «Кантале» нәмпи ар суват нарасты па ариты ёх ар хәләнтсүв.

Щиты айлтыева хәлумкем щос ёнта пәсан вәс.

Путэр хәншәс:
Людмила Гурьева



Тäm арäңпутär Россия писателят тähия лунты нē Наталья Николаевна Малыгина ханшас. Лёв Манстар районан Уньюоган кэртän вэл. Стихат ёшколайн вэнлтыйлмалн ханшты питас. Тäm нē Манстар район арäң-путräң ёхн лэштум «Серебряная Обь», «Ассоциация поэтов Тюменской области» оса тähеңана лунман вэл.

Сäма räхты тät äня лыпыт

Тоньцин пунäң сäхын итпийн
Татың рүвың сäма räхты тät äняйе,
Исäт вöсты пумие
Ас вöты хоныңын.

Нöви вöртү тäя лыпыт,
Хöв нöв ар тät энумта
щирын,

Тайң щирын лыпыт йинки
пошим хорäсып
Тоньцин па так кер итпийн.
Тумтак утапса па юр отыт,
Турын Хон ими муш
ймäтты щирин,
Öвäс мöвн äнтöм щимäщ
мосты пум
Арсыр муши па кäши эвыйт!

Уйта сäма räхты тät äня
лыпыт räхыт
Унтың Евра юханын.
Тавытта ху энумта öттät
Арсыр шавиты тавытта
Юнга тäхи Югра мүвөв.

Наталья Малыгина
Ханты ясäна тулмащтас:
Любовь Кашлатова



Вэлум (Путär)

Ма вэлум вантсум. Ма вэн реп хуша нэмн вэсум. Ил, äñкäрмäсум па вэн вош шивалдäсум. Щи вош хуша ар тüt хётлäс. Ма щи реп эвэлт вош пёлө щи пэрлäсум. Тäm вош щимäщ атэлт вэс. Щи тütлäl - щит тüt нäлдäн, юхат вэсät. Тäm вэр па йис нäптän вэс.

Тäm кэрт хуша ёмäñхäтл, постасы. Мир вош хüлээт хуват нäхман шäшийлсät. Ма пэрлäсум. Еша кэрт нüмпийн яñксум. ёхат ил, латсум па ищи шäшийлты питсум, имухты ма хущема вош лавäлты ёх навäрсät, лыв тыяң нёл картэт тäйсät. Ма лыв эвэлтэла ѹн хунтасум, пäстыя ѹн мäнсум. Нäмäссум, муй ма пилëма питл? Лыв мäнem каталсэл па щи вош вэн хон ики хуша тäсэл.

- Нäң хуят па хултсаты юхатсäн? -хон ики иньшäсäc.

Ма лыв пätэла па хон мүв эвэлт юхтум хэ вэсум. Ма воша пёшас ов эвэлт ѹн лунсум. Ма щив нäмäлтä пэрлäсум.

- Ма мойң хэ, вэн реп эвэлт юхатсум-пэрлäсум.
Ма ѹл вантты лäñхалум, ёхат ма мäнлум, пэрлäлум.

- Пэрлäсэн, муй щирн щит? - Лупäс хон ики.

- Ма инулдum, - лупсум ма.

- Нäң муй щит луплän?
Щимäщ вэр ѹн вэлдял, -
лупäс хон ики.

Вош лавäлты хуят лунäс, мулты хон пäла лупäс. Хон ики лüвэл хэлäнтсäлэ па мäнem пätлам хота омäсты партсäлэ.

- Нäң пилена ёхат пу-
тартлum, - лупäс лыв.

Ма пätлам хота щи тäсьюм. щäта щи тäхäр-
сьюм.

Щäта па и хännexä ом-
сäc. Ма еша щäта вэсум, ёхат па лодюсум па щи пэрлëмäсум кирмäш мух-
ты. Ин ики ма пёлëма вант-
ман, ўнлäl пёлки пүнш-
ман щи хäшäс.

Ешавэс вош лавäлты хэйт мäнem шивалдäсэл па ма ѹпëмн щи навäрмäсät. Ма пэрлäсум, лыв па ма



▲ Любовь Тарлина ханшум хур, Касум кэрт ёшкола, 8 класс, 2018-мит ол

юпëмн нёхлäссät. ёхат ма хот лаңлаа еслäщсум, лыв ма хущема нух щи хэнхлäт. Лыв нэмäслäт, ма нэмхулта па ѹн мäнлум. Мäнem каталты ай тäхты хäшäс. Ма пäста нух щи пэрлëмäсум па щи мäнсум. Лыв сэмдэл вэнä пүншман щи хäшäс. ёхат ма ёмäң хот шивалдäсум, щив щи мäнсум. ємäң хот нюр вэн мүв лот хуша вэс. щив лунты пäта, хэнтэп хуват ил мäнты мосäс. Ма щив лунты вүтчийлсум, тэп пэп икийн ѹн еслäсьюм.

- Нäңена тыв ѹн räхл,
- мäнemä лыв лупäс.

- Муя па? - ма иньш-
мäсум.

- Нäң па щир хурасуп,
- лупäс пэп ики.

- Ма тэп вантлum па
мäнлум.

Пэп ики кашашäс па
мäнem щив щи еслäсэлэ. Ма щäта хöв ѹн вэсум, ким
етсум. Па щи, волмëм щи
етшäс. Ушхүль вэн вэс.
Ушхүль вэлум вэс.

Путär ханшас:
Наталья Мешалкина
Ханты ясäна тулмащтас:
Альбина Гришкина



Тунты пурмасат ванлтасыйт

Ёмвошн ай көр тылдышн 4-мит хатлән ремёслайт Центр хотн ванлупсы вәс. Иис пурайн, вантэ, тунты пурмасат эвәлт арсыр мүв ёх хот лаңд лаңксат, ант-сәнәт вәрсат ләтут пунты па туләх әкәтты щира, тунты хопат тайсат. Тунты мет яма мәнләл, нямак па так пурмаса йил. Ванлупсын хәнты, вухаль па рүш пурмасат альсыйт, щит арсыр воңщупат, хинтат, сәнәт, рүш тунты нират.

Щи пурмасат и хурас-пет па мүв ёх хуша. Ишиты ёнтсат, сэвсат, хураман хәншет щив вәрсат. Нижневартовской мүвн тунты пурмасат хәншидал нюр па щират. Вах юхан ёх еша ёнтая хураман хәншет щив вәрдат. Касум ёх арсыр ар әмәш хәншет щив хәншләт, нәй сух, рүш пав сүх эвәлт ёнтиләт.

Тәмәш ванлупсын арсыр мүв хәнте мири әльты ләңхалат, муй пәтә лыгведа мосл түнты па муй щит эвәлт пиш вәл вәрт.

Вәйтантупсын ёха луплат па ванлтәләт катра щирн вәрум пурмасат, ин йилуп щурас ола юхатсат. Кашан шуши мир ёх Ёмвош мүвн лыв щирелн хураман хәншет, пават па катра иис вәрт түвман вәлдат.

Хуты лупсат, щата рәпитетты хотн мирхотат, округ мүв «Мастер года» вәйтантупсат вәрдат. Ишиты шуши мир күтн мүвтәл «Югра» нәмуп утат ләштәләт, щата лыв пуртартлат, па ёх эвәлт вәнлтәйләт.

Ишиты мүн хущева рәпитеттү ёхлүв тәса па хурамана па мир эвәлт вантләт, вәнлдат тунты эвәлт арсыр пурмасат вәрт. Тунты пурмасат Ёмвош мүв хәнты, вухаль кәртат па ай вошат эвәлт түвум утат, щи пәта ванлупсат ара йилдат. Щата лыв тәс ёх пила вәйтантыйләт, щи мир арсыр хураман пурмасат щи рәпитетты хота мәлдат.

Тәм лампа ванлупсы тәнлуп тылдыш эвәлт ол-нитсы па ван хатлуп тылдыш



вәнта рәпитеттү питл. Шуши мир па кашан мойн хуят пишәл вәл юхатты па тәм ванлупсы вантты.

Путар хәншас: **Фёдор Молданов**

Пелагея Алексеевна Гришкина хүв пәнта шәшмас...



Ай көр тылдыш 13-мит хатлән Түкъякән кәрт эвәлт шәкән айке, юхтас – тәмхатл хәнты миров йис вәлупсы тәтү ими Пелагея Алексеевна Гришкина (Лельхова) ўнтәма йис.

Лүв лыпәт хойты тылдыш 1-мит хатлән 1932-мит олн Паштәр кәртән сәма питас. Ләль пурайн ай Пелагея эвие колхозн вән ёха нәтас, щирн «Труженик тыла» нәм тәйс.

1955-мит олн икия мәнәс па Түкъякән кәртә вәлтү касләс.

Айтәлән юлн йис пүтрат, моньшат, арат хәләнтыман һәмәс, щирн елды рәт ёхдал йис пүтрат пүтартас, моньшат моньшас па арат арийс. Щитат мадьяр учёной ими Ева Шмидт нух хәншас па киника есләс. 1997-мит олн Людмила Хомляк «Арәм-моньшем ел, ки мәнл...» киника есләс. П.А. Гришкина арат ЮНЕСКО тәхийн «Память мира» вәр щирн ләвәлман вәлдат.

Тәм хәнты имиев вәлупсәл мәр иса муй ар мосты вәр ләштәттү яма-тәса хошас – йис пүтрат, моньшат моньшас, тәса арат арийс, хураман ләмәтсүхат ёнта. Юхи хәшум хатләл вәнты Түкъякән кәртән айлат ёха хәнты мир вәрт, ёмәнхатләт ләштәттү нәтас.

Тәм нявләк сәмуп хәнты имиев вәккәши нәмман тайты питләв. Мүн па иса Ёмвош округ шуши мир лүв рәтлала шаляң ясән китлүв.

«Хәнты ясән» па «Луима сәрипос» газетайнәлүвн рәпитеттү ёх

Ханты ясанг
(Хантыйское слово)
№6 (3618), 23.03.2023

Соучредители
Дума, Правительство
Ханты-Мансийского
автономного округа – Югры
Издатель
Департамент общественных,
внешних связей и молодёжной
политики Ханты-Мансийского
автономного округа – Югры

Редакция

Директор, главный редактор –
Динисламова С.С.
Телефон (3467) 33-36-82

Заместитель главного
редактора – **Рагимова Н.В.**
Телефон (3467) 33-24-02

Ответственный секретарь –
Вах Н.И.
Телефон (3467) 33-24-02

Адрес редакции и издателя:

628011, г. Ханты-Мансийск,
ул. Комсомольская, 31
тел./факс (3467) 33-17-52

E-mail: gazeta@khanty-yasang.ru

Газета размещена на сайте
www.khanty-yasang.ru

Отпечатано:

ООО «Новости Югры-
Производство» г. Сургут,
ул. Маяковского, 14.

Индексы 04393, 54393

Тираж **2166** экз.

Заказ **1153**

Цена свободная

Газета
зарегистрирована
Управлением Федеральной
службы по надзору в
сфере связи,
информационных технологий
и массовых коммуникаций по

Тюменской области,
ХМАО-Югре и ЯНАО.

12+

Свидетельство о регистрации
ПИ №ТУ 72-00796
от 23 января 2013 г.

Мнение авторов публикаций
не обязательно отражает
точку зрения редакции.